

## MOLTAÍ CHONRADH NA GAEILGE DO CHOMHAIRLIÚCHÁN FHORAS NA GAEILGE FAOI MHAOINIÚ D'IONAID GHAELGE

Tá Conradh na Gaeilge ag moladh na freagraí seo a leanas a thabhairt ar chomhairliúchán Fhoras na Gaeilge faoi Scéim na Lárionad Gaeilge. Tá baol ann, má dhéanfar ciorruithe ar mhaoiniú an dá chultúrlann, go gcuirfean an dhá ionad seo i mbaol mór. Tá sé tábhachtach go seasann muid leo agus go lorgaíonn muid, mar phobal, an tacaíocht chuí do gach Lár Ionad Gaeilge ar fud na hÉireann, seachas an sob in áit na scuaibe. Tá Plean Infheistíochta, atá aontaithe ag breis is 80 grúpa Gaeilge & Gaeltachta, ar lorg infheistíocht do €1.5 milliún do na lár ionaid. Seo an tacaíocht atá ag teastáil.

Is é an Déardaoin, 22ú Meitheamh ar a 1pm an spriocdáta don chomhairliúchán. Tá cóip de cháipéis an fhorais ceangáilte agam agus tá na colún freagartha i dtreo deireadh na cáipéise sin.

Seo iad na freagraí molta ar an cheithre cheist a chuirtear sa chomhairliúchán, le líonadh sna spásanna sa cháipéis a thugtar le freagraí a thabhairt:

### Ceist 1

Aontaíonn muid go bhfuil gá le scéim chun cabhrú le lárionaid Ghaeilge a fhorbairt ar fud na hÉireann. Tá muid den tuairim fosta gur ionaid rithábhachtacha iad an dá Chultúrlann i mBéal Feirste agus i nDoire don Ghaeilge agus do phobal Gaeilge na tíre ar fad. Mar sin de tá muid den bharúil nár chóir ceachtar den dá Chultúrlann a chur i mbaol, mar atá siad tar éis a chur in iúl dúinn a tharlóidh má chuirtear na ciorruithe molta i rogha (iii) agus a (iv) sa cháipéis seo i bhfeidhm,.

Feictear dúinne go bhfuil fadhbanna bunúsacha bainte le gach rogha atá leagtha amach thuas. Ní áirítear aon rogha ina measc seo áfach, le gur féidir le duine sa phobal aontú go bhfuil gá ann do scéim lárionad chun tacaíocht a thabhairt do lárionaid Ghaeilge, ach gur chóir go gcuirfí a leithéid de scéim ar bun le maoiniú as an nua ón dá Rialtas chuige seo.

Mar sin de, molann muid go láidir gan brú ar aghaidh le ceann ar bith de na roghanna atá luaite sa cháipéis seo agus gur chóir d'Fhoras na Gaeilge dul sa tóir ar an €1.5m atá riachtanach do chiste le lárionaid Ghaeilge a fhorbairt ar fud na hÉireann, mar atá luaite sa phlean infheistíochta.

Tá an-bhaol ann go mbeidh níos mó drogall ar an dá Rialtas aon airgead nua a thabhairt do Scéim Lárionad Gaeilge má cheapann siad gur féidir le Foras na Gaeilge an ciste maoinithe atá ag an bhForas a ghearradh níos mó leis an gcúram seo a chomhlíonadh. Tá an chomhairliúchán seo, mar sin, ag tabhairt an leithscéil sin dóibh, go háirithe mar gheall nach bhfuil an cúigiú rogha ann, i. gur chóir scéim lárionad a bheith ann le ciste maoiniú nua de €1.5 milliún.

**B'fhearr don Fhoras a rá leis an dá Rialtas go soiléir nach féidir leis an bhForas aon rud luaite sa phlean infheistíochta nó aon scéim nua eile a thosú mar gheall ar easpa maoinithe.**

## Ceist 2

Aontaíonn muid go láidir go bhfuil gá le scéim le cabhrú le lárionaid Ghaeilge a fhorbairt ar fud na hÉireann. Sin ráite, creideann muid go bhfuil roinnt fadhbanna bunúsacha ag baint leis an scéim atá molta thuas.

Is í an príomhfhadhb í ná go bhfuil sé molta thuas an scéim a reáchtáil “laistigh den chiste reatha maoinithe atá againn d’ionaid”. Dar linn tá infheistíocht cheart de dhíth le gur féidir na dúshraitheanna buana a leagadh a bheadh de dhíth ar aon lárionad Gaeilge. Chuige sin tá an phlean infheistíochta ann, arna aontú ag 80 grúpa Gaeilge, ina bhfuil €1.5m luaite mar íosmhéid riachtanach do chiste tacaíochta le lárionaid Ghaeilge a fhorbairt ar fud na hÉireann. Chuir an Foras féin a n-ainm leis an phlean sin, agus bheadh buaireamh orainn má bheartaíonn Foras na Gaeilge ar bhrú ar aghaidh le ceann de na roghanna thuasluaite go ndéanfaidh sé dochar don phlean infheistíochta – infheistíocht a bhfuil géarghá léi.

**Molann muid gan an scéim atá molta a chur i bhfeidhm. Molann muid gur chóir d’Fhoras na Gaeilge dul sa tóir ar an €1.5m atá riachtanach do chiste le lárionaid Ghaeilge a fhorbairt ar fud na hÉireann, mar atá luaite sa phlean infheistíochta.**

## Ceist 3

Níl aon mholtaí breise againn seachas nár chóir ciorruithe a chur i bhfeidhm ar an dá Chultúrlann i mBéal Feirste agus i nDoire, agus gur chóir dul sa tóir ar airgead nua ón dá rialtas le gur féidir an €1.5m atá riachtanach do chiste le lárionaid Ghaeilge a fhorbairt ar fud na hÉireann a chur ar fáil, mar atá luaite sa phlean infheistíochta arna aontú ag 80 grúpa Gaeilge agus Gaeltachta (Foras na Gaeilge san áireamh).

## Ceist 4

Níl aon mholtaí breise againn seachas nár chóir ciorruithe a chur i bhfeidhm ar an dá Chultúrlann i mBéal Feirste agus i nDoire, agus gur chóir dul sa tóir ar airgead nua ón dá rialtas le gur féidir an €1.5m atá riachtanach do chiste le lárionaid Ghaeilge a fhorbairt ar fud na hÉireann a chur ar fáil, mar atá luaite sa phlean infheistíochta arna aontú ag 80 grúpa Gaeilge agus Gaeltachta (Foras na Gaeilge san áireamh)."